

païs, il fera voir l'estime que vous faites des croyans; cét affaire est important, vostre autorité en touchera plusieurs, & vostre present ne fera iamais mis en oubly: Puis se tournant vers les Sauvages; Mes freres, si vostre cœur a de la ioye me voyant fait enfant de Dieu, le mien en doit ressentir dauantage, vous voyant tous dans la possession de ce bon-heur; vous m'a-ués deuancé & ie vous veux fuiure & imiter: si vous desirés d'aller au ciel, i'ay les mesmes volontés; si vous faites profession de garder les Commandemens de Dieu, c'est ce qu'auiourd'huy i'ay publiquement promis & protesté, i'espere que iamais ie ne me démentiray de ma parole: Nous n'auons rien de si precieux que nos colliers de porcelaine, si i'en voyois briller vne vingtaine deuant mes yeux pour m'allecher au peché, ie détournerois ma veuë, & mon cœur auroit du dégoust de ce qu'il a tant aimé. Nous faisons estat dans nos Bourgades de quelques habits, & de quelques robes qui font en estime parmy [79] nous; si ce que nous appellons beauté me presentoit vne de ces robes pour me corrompre, ie luy dirois: Si le Dieu que i'adore veut que ie me ferue de ces habits, il m'en fera trouuer par d'autres voyes, le peché est banny de mon cœur, il n'y doit iamais rentrer; & si par les mesmes attraits on m'offroit vn baril de poudre, & des armes toutes de feu pour destruire nos ennemis, ie respondrois; celuy qui a purifié mon ame ne veut pas que ie la fallisse de rechef, il a bien d'autres moyens de me proteger, i'aymerois mieux perdre la vie que de l'offenser; Voila, mes freres, les resolutions que ie prens dans mon baptesme, au reste ma famille est desia toute baptifée, mes enfans & mes neueux font Chrestiens, il ne reste plus que ma